

आकाशवाणी जयपुर-अजमेर
प्रादेशिक समाचार।

दिनांक 03.06.2024
समय: 18.45 बजे

- प्रदेश रा सगळा 25 लोकसभा हलकां रा चुणाव अर बागीदौरा विधानसभा हलका रा उपचुनाव मांय पड्या वोटों री गिणती काल संवारे 08 बज्यां सरू व्हेला।
- मुख्य चुनाव आयुक्त राजीव कुमार कह्यो-18वीं लोकसभा रा चुणाव मांय 64 करोड़ ऊं बत्तां मतदातां वोट दे र कीर्तिमान बणायो।
- राज्य मांय पश्चिमी विक्षोभ रो असर खत्म व्ह्यो- केई ज़िला मांय तेज तावड़ा अर गर्मी ऊं जिन्दगी माथे असर पड्यो।
- प्रदेश मांय विश्व साईकिल दिवस रे मौके रैलियां रे मार्फत पर्यावरण रा प्रति जिम्मेदारी अर स्वस्थ जीवन शैली रो संदेश दियो ज्यो।

000

राज्य मांय 25 लोकसभा हलकां मांय पड्या वोटों री काल गिणती करी जावेला। लोक सभा री सगळी 25 सीटां माथे चुणाव अर बागीदौरा विधानसभा हलका मांय उपचुनाव सारू दिया ज्या वोटों री गिणती काल संवारे 08 बज्यां सरू व्हेला। मुख्य निर्वाचन अधिकारी प्रवीण गुप्ता बतायो के सब ऊं पैली संवारे 8 बज्यां डाक मत पत्रां रे जरिये दिया ज्या वोटों री गिणती सरू करी जावेला। संवारे साढे आठ बज्यां ऊं 2 सौ 35 कमरां मांय ईवीएम रे जरिये दिया ज्या वोटों री गिणती सरू व्हेला। ईवीएम रे जरिये दिया ज्या वोटों री गिणती सारू 2 हजार 713 टेबलां अर डाक मतपत्र अर ईटीबीपीएस रे जरिये दिया ज्या वोटों री गिणती सारू आठ सौ इकतालीस टेबलां लगायी ज्यी है। मुख्य निर्वाचन अधिकारी बतायो के सगळा 25 लोकसभा हलकां सारू वोटों री गिणती रा 4 हजार 33 दौर व्हेला। सब ऊं बत्ता 206 दौर राजसमंद मांय अर सब ऊं 143 दौर मांय बीकानेर लोकसभा हलकां मांय गिणती करी जावेला।

.....

लोकसभा हलका मांय विधानसभा हलकावार वोटों री गिणती रा बत्ता ऊं बत्ता दौर री तादाद रा आधार ऊं टोंक-सवाईमाधोपुर लोकसभा हलका मांय सब ऊं कम बीस जद के राजसमंद लोकसभा हलका मांय सब ऊं बत्ता 28 दौर मांय वोटों री गिणती करी जावेला। मुख्य निर्वाचन अधिकारी बतायो के वोटों री गिणती सारू रिटर्निंग अहलकार, उप निर्वाचन अधिकारी, काउंटिंग सुपरवाइजर, काउंटिंग असिस्टेंट, काउंटिंग स्टाफ अर माइक्रो ऑब्जर्वर समेत 13 हजार ऊं बत्ता कर्मचारियां री नियुक्ति करी ज्यी है। वोटों री गिणती वाळी टेबलां सारू करीब 3 हजार 5 सौ 50 माइक्रो ऑब्जर्वर अर 1 हजार 200 ऊं बत्ता सहायक रिटर्निंग अधिकारी (एआरओ) लगायी ज्या है। निर्वाचन आयोग राज्य मांय 56 मतगणना पर्यवेक्षक ई तैनात कीना है। वोटों री गिणती री ठौड़ां हिफाजत सारू पुख्ता इन्तजामात करी ज्या है। ऐडी सगळी ठौड़ां तीन लेबल रा हिफाजती इन्तजामात कर्या जावेला। जयपुर रा पुलिस आयुक्तालय हलका मांय 5, अजमेर ज़िला अर भीलवाड़ा मांय 3-3 अर वोटों री गिणती वाळा दूजा ज़िलां मांय आरएसी री 2-2 कंपनियां या प्लाटून तैनात करी जावेला। ज्यां ज़िला मुख्यालय परां वोटों री गिणती नी करी जा रही है वठे ई आरएसी री 1-1 कंपनी/प्लाटून तैनात करी जावेला।

काल व्हेवण वाळी वोटों री गिणती ने ध्यान राखता थकां पूरा राज्य मांय सूखा दिवस रो ऐलाण करी ज्यो है। ई बीचे वोटों री गिणती ऊं पैली सगळी सीयू, वीवीपैट मशीनां अर संबंधित कागजात ने स्ट्रॉन्ग रूम ऊं गिणती री

ठौड़ ताई लावण अर वठे ऊं वोटां री गिणती पूरी व्ह्यां पाछे पाछी स्ट्रॉन्ग रूम ताई ले जावण रा काम माथे ई सीसीटीवी कैमरा रे जरिये निगराणी राखी जावेला। ई बीचे प्रदेश मांय पड़ रही जोरदार गर्मी ने ध्यान राखता थकां प्रदेश मांय वोटां री गिणती री सगळी 29 ठौड़ां ठण्डक राखण री अर बिजली री लगातार पूर्ति तैय करी जावेला। म्हाणा खबरनवीस बतायो के काल राज्य रा केई दिग्गज नेतावां रा सियासी भाग रो फ़ैसलो व्हेला।

ई बीचे **दौसा** मांय वोटां री गिणती सारू आज ई काम मांय लगायोडा कर्मचारियां ने आखिरी दौर री सिखावण दीरीजी। वठे वोटां री गिणती सारू डोढ सौ टेबलां लगायी ज्यी है। **कोटा** मांय ई आज वोटां री गिणती री ड्यूटी मांय लाग्योडा कर्मचारियां अर एजेंट्स ने सिखावण दीरीजी। **भीलवाड़ा** रा जिला निर्वाचन अधिकारी, एस.पी. अर पर्यवेक्षक गिणती री ठौड़ सरकारी पॉलिटेक्निक कॉलेज रो दौर कर र व्यवस्थावां रो जायजो लीनो। वठे 142 टेबलां माथे गिणती करी जावेला। **बाड़मेर** रा सरकारी पी.जी. कॉलेज मांय करी जावण वाळी वोटां री गिणती सारू 144 टेबल्स लगायी ज्यी है। **झालावाड़** रा पॉलिटेक्निक कॉलेज मांय करी जावण वाळी गिणती सारू विधानसभा हलकां रा आधार ऊं 12-12 टेबलां लगायी ज्यी है अर वोटां री गिणती वाळा परिसर मांय अर बाहर 1 हजार 200 सुरक्षाकर्मी तैनात रेहवेला।

000

आकाशवाणी समाचार जयपुर री ओर ऊं लोकसभा चुणाव मांय पड़्या वोटां री गिणती ऊं जुडी ताजा जाणकारी जनता ताई पूगावण सारू काल खास समाचार बुलेटिन प्रसारित कर्या जावेला। राजस्थानी मांय खास चुणाव समाचार बुलेटिन संवारे 10 बज्यां, दोपहरां 12 बज्यां, दोपहरां पाछे 3 बज्यां अर सिंज्यां 5 बज्यां प्रसारित कर्या जावेला। हिन्दी मांय खास चुणाव समाचार बुलेटिन संवारे 11 बज्यां अर सिंज्यां 4 बज्यां प्रसारित कर्या जावेला। 5-5 मिनट रा अ समाचार बुलेटिन प्रदेश मांय आकाशवाणी रा सगळा केन्द्रां ऊं रिले कर्या जावेला। ई सागे ई क्षेत्रीय समाचार एकांश री ओर ऊं राज्य मांय लोकसभा चुनाव रा नतीजा रा बारा मांय आधे घंटा री खास लाइव चर्चा रात 8 बज्यां प्रसारित करी जावेला, जो पूरा प्रदेश मांय सुणी जा सकेला।

000

ई दफ़ा रा लोकसभा चुनाव मांय 64 करोड़ ऊं बत्ता मतदाता वोट दे र विश्व रिकॉर्ड बनायो है। मुख्य चुनाव आयुक्त राजीव कुमार आ जाणकारी दीनी। आज नई दिल्ली मांय खबरनवीसां सागे बातचीत करता थकां मुख्य चुनाव आयुक्त कह्यो के ओ जी-7 देशां अमेरिका, ब्रिटेन, फ्रांस, जर्मनी, इटली, जापान अर कनाडा रा वोट देवण वाळां री तादाद रो डोढ गुणो है। वे कह्यो के ई लोकसभा चुनाव मांय 31 करोड़ ऊं बत्ती महिलावां वोट दीना, जो दुनिया मांय हाल ताई री सब ऊं मोटी तादाद है। वे बतायो के वोटां री गिणती री ठौड़ां केंद्रीय सशस्त्र बलां रा तीन स्तर रा हिफाजती इन्तजामात करी ज्या है। मुख्य चुणाव आयुक्त बतायो के हर मतगणना टेबल माथे माइक्रो पर्यवेक्षकां सागे मतगणना केंद्रां माथे चौबीस ई घंटा सीसीटीवी रे जरिये निगराणी राखी जावेला। जम्मू-कश्मीर विधानसभा रा चुनाव करावण ऊं जुड्या एक सवाल रा जवाब मांय मुख्य चुणाव आयुक्त कह्यो के जम्मू-कश्मीर मांय बेगी ई विधानसभा चुनाव री प्रक्रिया सरू करी जावेला।

000

राज्य मांय आज ओजू तेज गर्मी रही अर लू बाजी। जयपुर मांय 42 डिग्री सेल्सियस रे आरे-सारे तापमान सागे तेज धूप अर उन्ना बायरा ऊं परेशानी व्ही। मौसम विभाग रे मुजब आवता 48 घंटा मांय राज्य रा अथूणी हलका मांय सरहदी हलका रे अलावा बाकी हलकां मांय पारा मांय घणो उतार-चढ़ाव व्हेवण रा आसार नी है। सरहदी हलकां मांय आवता 4-5 दिन अधिकतम तापमान 45-46 डिग्री सेल्सियस रे आरे-सारे रेहवण री संभावना है। मेहकमा रे मुजब प्रदेश रा घणखर हलकां मांय तेज गर्मी ऊं आराम मिलण री संभावना है।

000

राज्य मांय 5 जून ने मनाया जावण वाळा विश्व पर्यावरण दिवस रा सिलसिला मांय आज विश्व साइकिल दिवस मनायी ज्यो। ई मौके मुख्यमंत्री भजनलाल शर्मा जनता ने शुभकामनावां देता थकां स्वस्थ जीवन अर साफ़ आब-ओ-हवा बनायी राखण री जिम्मेदारी लेवण अर प्रदूषण कम करणो तैय करण री अपील कीनी। विश्व साइकिल दिवस रे मौके जयपुर मांय जवाहर लाल नेहरू मार्ग माथे संवारे 'वुमेंस साइक्लोथॉन' राखी ज्यी, जिण मांय महिलावां साइकिल चला र स्वस्थ जीवन शैली रो संदेश दीनो। भरतपुर मांय ई शास्त्री पार्क ऊं किला रा संग्रहालय ताई साइकिल रैली निकाली ज्यी अर पौधा रोपी ज्या। साइकिल दिवस मनावण रो मकसद मोटर

गाड़ियां रे कारण पर्यावरण अर धरती ने नुकसाण ऊं बचावणो है। पर्यावरण दिवस रा सिलसिला मांय प्रदूषण नियंत्रण मंडल री ओर ऊं **गीले कचरे से खाद बनाना** मुद्दा माथे कार्यशाला राख्थी ज्यी। बांसवाड़ा मांय ई प्रताप सर्किल माथे आज संवारे संभागीय आयुक्त साइकिल रैली ने हरी झंडी बता र रवाना कीनी, जिण मांय महिलावां उमाव सागे सिरकत कीनी। **झालावाड़** ज़िला मांय साइकिल प्रेमियां रो स्वागत करी ज्यो अर गोष्ठी राख र साइकिल चलावण रा फायदां री जाणकारी दीरीजी। **जैसलमेर** मांय नगर परिषद अर वायुसेना टेशन री ओर ऊं गड़ीसर तालाब ऊं हनुमान सर्किल तांई साइकिल रैली निकाळी ज्यी। ई मौके मौजूद लोगां री साफ सफाई राखण री सौगंध दिरायी ज्यी।